

Subhija Kuljuh *

UTISCI SA SAVJETOVANJA ZENICA '95

Prvo savjetovanje u ratnim uslovima na slobodnom teritoriju Bosne i Hercegovine sa temama:

- Geodetska djelatnost u obnovi i izgradnji zemlje;
- Zadaci imovinsko pravnih i geodetskih službi na provođenju Zakona o pretvorbi društvene svojine i upis nekretnina u vlasništvo države održano je u vremenu od 25-27.04.1995.godine.

Organizator, Savez GIG-a BiH ulogu domaćina je povjerio gradu Zenici, a ljubazni Zeničani su učinili sve da boravak gostiju bude što ugodniji.

Iako su uslovi putovanja bili krajnje teški, neizvjesni i po život opasni, odziv gostiju je bio veliki. Tokom popodneva 24.4.počeli su pristizati gosti u prelijepi objekat Doma penzionera u čijoj se dvorani i održavalo savjetovanje. Za većinu učesnika iz Sarajeva ovo je bio prvi izlazak iz grada pod trogodišnjom opsadom i užasa prouzrokovanog tom opsadom, pa tim više susreti sa kolegicama i kolegama iz drugih gradova bili srdačniji. Do duboko u noć pristizali su učesnici iz Mostara, Jablanice, Tuzle, Gradačca, Gračanice, Maglaja i svih drugih gradova slobodne teritorije.

Druženju i razgovorima nikad kraja, trebalo je upitati za sve kako se ko sjeti, gdje se ko našao u vihoru rata i kako se ko ponašao. Naročito su bile teške ispovjesti kolega koji su prošli torture logora.

Prema programu rada svečani dio prve sjednice počeo je 25.04.95.god. u 10 časova u sali ispunjenoj do posljednjeg mjesta. Osim gostiju, savjetovanju je prisustvovalo cca 150 učesnika. Predsjednik organizacionog odbora gosp. Begić Mustafa pozdravio je prisutne u ime Saveza GIG-a i Uprave za geodetske i imovinsko pravne poslove R BiH i tom prilikom naglasio da pred ovom generacijom stoji velika obaveza da opravda povjerenje čime su nas zadužile naše prethodne generacije, koje su iznijele teret obnove i izgradnje zemlje nakon II svjetskog rata. Nakon izbora radnih tijela, Begić Mustafa je u ime resornog ministra gosp. Munevera Imamovića, koji je bio spriječen da lično prisustvuje, otvorio savjetovanje i poželio uspješan rad. U kratkom izlaganju gosp. Begić je iznio podatke o značaju geodezije u sveukupnoj obnovi i izgradnji zemlje, te podvukao važnost ovog savjetovanja u smislu usaglašavanja mišljenja i metoda na rješavanju predstojećih zadataka.

* Subhija Kuljuh, inž. geod. Uprava za geodetske i imovinsko-pravne poslove Sarajevo

Potom su uslijedili pozdravi. U ime SO Zenica, gospoda Halida Pojskić zaželjela je dobrodošlicu i plodonosan rad, gosp. Hidajet Pozderac ispred Tuzlansko-Podrinjskog kantona, a gosp. Sarić Šučrija u ime Geodetskog zavoda iz Sarajeva i time je završen svečani dio.

Nakon pauze uslijedilo je izlaganje referata.

Posljednja dva referata su izložena drugog dana savjetovanja, a sa radom se počelo u 9 časova. Nakon toga je otvorena diskusija u kojoj su uzeli učešće mnogi od prisutnih. Izneseni su problemi sa kojima se u svom radu suočavaju skoro sve opštinske geodetske organizacije počev od nedostatka kadrova, opreme, uništenog elaborata, školovanja kadrova, zaštite podataka i sl.

Povezujući sve izložene referate i diskusije gospodin Begić Mustafa konstatuje da će to sve biti predmet aktivnosti u geodetskoj struci u narednom periodu, te predlaže da se Upravi za geodetske i imovinsko-pravne poslove R BiH sve ovo dostavi u pismenoj formi kako bi se svi problemi mogli sistematično rješavati.

Iako se savjetovanje održava u ratnim uslovima, u kojima je neprimjereno veseliti se, ipak se nije mogla prekinuti tradicija ranijih geodetskih susreta i druženja, pa je i ovaj put organizovana zajednička večera na kojoj su se okupili svi učesnici. Uz razgovor i poneko podsjećanje na zgrade i nezgode sa terena nije se ni osjetilo kako je davno prošla ponoć.

Trećeg dana savjetovanja na dnevnom redu bili su problemi vezani za geodetske i imovinsko pravne poslove na provodjenju odredaba Zakona o pretvorbi društvene svojine i reprivatizaciji imovine u BiH.

Uvodno izlaganje podnijeli su gospoda Hadžić Nedžida, dipl.pravnik u Upravi za geodetske i imovinsko-pravne poslove R Bosne i Hercegovine i gosp. Keleštura Selver, dipl.pravnik - sekretar opštine Zenica.

Obzirom na aktuelnost i složenost ove materije, diskusija je bila vrlo plodna i za jedan dan rada moglo se samo ukazati na najvažnija pitanja koja se kod donošenja zakona u narednom periodu moraju detaljno regulisati. Naročito je naglašeno da se prilikom donošenja zakona mora voditi računa o ekonomskoj moći države.

Uz konstataciju gosp. Imamović Jasmina, sekretara općine Tuzla, da je ovo vidjenje pod cijenu života i da samim tim rezultati ne mogu izostati, gospodin Begić Mustafa je zatvorio savjetovanje i zaželio svim učesnicima da se sretno vrate svojim kućama.